

U povodu 60. godišnjice postojanja Fakulteta političkih nauka (FPN) Univerziteta u Sarajevu prigodnom svečanašću u Sarajevu, 8.11.2021. godine otvoren Centar za međunarodno politiku i postkonfliktna istraživanja pri ovom fakultetu.



Svečanosti je, uz domaćina, dekana FPN, **prof. dr. Seada Turčala**, prisustvovao predsjedavajući Predsjedništva Bosne i Hercegovine **Željko Komšić**, sa saradnicima, te britanski ambasador u našoj zemlji **Matthew Field**.



“Veliko hvala na pozivu danas. Ovo je prestižna lista govornika i panelista, a rad većine pratim već neko vrijeme. Ovo je važan događaj, na temu koja mi je bliska srcu – veza između lokalnog i globalnog. Bosna i Hercegovina danas je dokaz te povezanosti, te veze. Priznaću da mi je drago što su pokretači bh. akademska zajednica i institucije, sa bh. Glasovima” – kazao je britanski ambasador Matthew Field.

Govoreći o odnosima BiH i Velike Britanije, N.J.E. istaknuo je da osjeća dubinu istorije i povezanosti između dvije zemlje.



"Čestitam vam 60. godišnjicu. Šest decenija djelovanja FPN-a je velika stvar. Jedna institucija ovakvog kalibra sigurno ima razloga biti ponosna. U ovih 60 godina prošli ste svašta...Imate kao institucija jedno veliko iskustvo iza sebe. Otvaranje Centar za međunarodnu politiku i postkonfliktna istraživanja jeste novi iskorak u prema nečemu što treba biti obilježje cijelog obrazovnog sistema, posebno visokoškolskog. Ne samo edukacija i ponošenje znanja, već i istraživanja. Želim vam puno sreće i uspjeha. Nadam se da ćete u kratkom roku pokazati da je ovo ispravan put", kazao je Komšić.



Dekan Turčalo je istakao da je FPN zasigurno temeljna obrazovna institucija u oblasti proučavanja i istraživanja društvenih nauka u BiH.

"Kroz javni i znanstveni angažman nastavnika i saradnika ovaj fakultet ima aktivnu ulogu u kreiranju identiteta i afirmaciji države BiH utemeljene na principima liberalno-demokratskog i multietničkog društva zasnovanog na znanju... Otvaranjem Centra za međunarodne odnose i poskonfliktna istraživanja cilj nam je da proširimo istraživački i policy orijentiran kapacitet i opseg djelovanja FPN-a", poručio je Turčalo.

Centar osnovan na inicijativu grupe stručnjaka u oblasti političkih nauka i međunarodnih odnosa sa zajedničkim ciljem da doprinesu kreiranju društvene klime neophodne za definisanje i redefinisane javnih politika u Bosni i Hercegovini orijentiranim ka univerzalnim vrijednostima EU i zapadnog svijeta.

Otvaranje Centra je upriličeno organiziranjem prve međunarodne konferencije: „Svijet i mi“ sa ciljem unapređenja pozicije BiH u svijetu. Na konferenciji su učestvovali eminentni intelektualci, profesori, novinari i diplomate: Vesna Pusić, Nerzuk Ćurak, Adnan Hadorivć, Mirza Hajrić, Sead Turčalo, Nermina Mujagić, Igor Davidović, Nedžma Mirašćija Džananović, Amer Kapetanović, Elmir Sadiković, Sarina Bakić, a u ulozi diskutanta sa panelistima bio je vanjskopolitički novinar Erol Avdović, koji se javio iz New Yorka.





Ova konferencija nije dio nekog međunarodnog projekta, kazala je voditeljica Centra prof. dr. Nermina Mujagić. „Konferencija je rezultat brige i želje grupe entuzijasta/stručnjaka iz političkih nauka i međunarodnih odnosa koja čije karijere nije odredilo samo ono što su oni stvarali, ali postoji jedna nit koja ih povezuje: oni znaju reći NE politikama prijetnje, i liderima koji su mržnjom i agresivnim nacionalizmima zadojeni“. Centar za međunarodnu politiku i postkonfliktna istraživanja otvoren je u namjeri da se društvene krize prevladavaju konstruktivnom akademskom raspravom i obnovom javnog razgovora.



Učesnici konferencije razgovarali su o lokalnim i međunarodnim izazovima države Bosne i Hercegovine i društva.

